

आकाशवाणी

खास-खास खबरां:-

1. कैबिनेट नै लौहकी पन-बिजली योजना SHPS गी मंजूरी दिती- जम्मू-कश्मीर ते लद्दाख गी एदे कन्नै ज़बरदस्त फायदा होग।
2. एअर इंडिया ते एअर इंडिया एक्सप्रेस अज्ज पश्चिम एशिया क्षेत्र ताई ते उत्थुआं बी कुल 48 डोआरियां संचालित करोग।
3. सरकारै टोल सरबंधी नियम-कायदें दी पालमा यकीनी करने ते डिजिटल माध्यमें राएं उनें गी लागू करने दी प्रक्रिया गी मज़बूत बनाने आस्तै राश्ट्री जरनैली सिडक नियम 2026 च तरमीम कीती ऐ।
4. नौ-दिन तग्गर चलने आहला चेत्र नरातें दा पवित्र त्योहार अज्जै थमां रम्भ होआ करदा ऐ।
5. आई.पी.एल 2026 दे किश शुरुआती मैचें इच Sunrisers हैदराबाद दी कप्तानी ईशान किशन करगंन।
6. मौसम विभाग नै जम्मू-कश्मीर ते लद्दाख च बड़ी मती बरखा दी संभावना गी दिक्खदे होई ऑरेंज अलर्ट जारी कीता ऐ।

<><><><><><>

SHP -J&K

इक्क इयै लेया फैसला जेदे कन्नै जम्मू-कश्मीर ते लद्दाख केन्द्र शासित प्रदेशें गी बड़ा मता लाह होग- केन्द्री कैबिनेट नै कल लौहकी पन-बिजली विकास योजना SHP गी मंजूरी देई दिती। इस स्कीमै ताई 2 जहार 584 करोड़ 60

लकख रुपे दा बजट रखेया गेआ ऐ। एदे कन्नै 1500 MW दी समर्था आहले प्रोजैक्ट लाए जागंन। इस स्कीम कन्नै टकोहदे तौरा पर उत्तर पूर्वी राज्यें ते पहाड़ी राज्यें सनें उनें जिलें गी फायदा होग- जिंदी सरहद अंतराश्ट्रीय बन्नै कन्नै लग्गदी ऐ। कैबिनेट दी इक्क बैठक मगरा जारी कीते गेदे इक्क ब्यानै च गलाया गया ऐ जे प्रधानमंत्री नरेन्द्र मोदी हुंदी प्रधानता च लग्गी दी कैबिनेट दी बैठक च ए फैसला लेता गेआ जे तकरीबन 1500 MW स्वच्छ ऊर्जा समर्थ विकसित करने ताई बनाई गेदी 2 जहार 585 करोड़ रुपें दी नर्मी स्कीम तैहत लौहकियें पन-बिजली परियोजनाएं गी मदाद दे तौरा पर प्रोजैक्ट दी लागत दा 30 प्रतिशत तग्गर जां फी MW 3 करोड़ 60 लकख रुपे तग्गर दी रकम दिती जाग। अधिकारियें इस स्कीम गी जम्मू-कश्मीर ते लद्दाख, दौने केन्द्र शासित प्रदेशें लेई मती उत्साह आहली दस्सेया ते गलाया जे एदे कन्नै उनेंगी माली तौरा पर आत्मनिर्भर बनने च मदाद होग। ए स्कीम भारत दे उस मकसद गी बी बल दिंदी ऐ जेदे तैहत जम्मू-कश्मीर ते लद्दाख च दरेयाएं दे पानी गी देसै दी हद दे अंदर गै रखना ते उसी पाकिस्तान बकखी जाने थमां रोकना ऐ।

<><><><><><><><>

Air India

एयर इंडिया ते एयर इंडिया एक्सप्रेस अज्ज पच्छम एशिया थमां 48 तय ते बशेश डुआरियां चलाडन। दौनें एयरलाइंस कंपनिएं आसेआ जेद्दा ते मस्कट लेई अपनी नियमित सेवां बरोबरी जारी रक्खियां जाडन, जिंदे च भारत ते जेद्दा दे बश्कार 16 डुआरियां शामिल न। एयर इंडिया दिल्ली ते मुंबई थमां इक-इक

वापसी आहली डुआरी चलाग, जिसलै के एयर इंडिया एक्सप्रेस बेंगलुरु, हैदराबाद ते कोझिकोड थमां डुआरी भरग। मस्कट लेई 6 तयशुदा डुआरियां चलाइयां जाडन, जेहिइयां दिल्ली, कोझिकोड ते मुंबई गी कवर करडन। एहदे अलावा, एयर इंडिया दिल्ली थमां रियाद लेई द'उं वापसी आहलियां डुआरियां बी चलाग। तय सेवाएं दे अलावा, एयरलाइंस संयुक्त अरब अमीरात ते सऊदी अरब लेई 30 बशेश डुआरियां संचालित करडन जेहिइयां उपलब्धता ते मुकामी परिचालन आहली स्थितियों पर निर्भर होडन।



Toll NHAI-2026

सरकार ने टोल अनुपालन ते डिजिटल प्रवर्तन गी सशक्त बनाने लेई राष्ट्रीय जरनैली सिडकें सरबंधी शुल्क नियम-2026 दे संशोधन गी लेइयै अधिसूचना जारी कीती ऐ। सिडक ट्रांसपोर्ट ते जरनैली सिडकें सरबंधी मंत्रालय ने दस्सेआ जे एह संशोधन बकाया उपभोक्ता शुल्क दे मामलें च इक तगड़ा तंत्र प्रदान करदा ऐ। इसी टोल संग्रह डिजिटल प्रवर्तन गी सशक्त बनाने लेई आहन्नेआ गेआ ऐ। एहदा मकसद राष्ट्रीय जरनैली सिडकें पर उपभोक्ता शुल्क दी कुशल ते पारदर्शी वसूली जकीनी बनाना बी ऐ। नियम-14 दे तैहत अधिसूचित बकाया उपयोगकर्ता शुल्क दी रिकवरी लेई बनाए गेदे तंत्र च तकनीकें आसेआ संचालित इलेक्ट्रॉनिक नोटिस-ई नोटिस प्रणाली शामिल ऐ। इस प्रणाली च पंजीकृत गड्डिएं दे मालिकें गी गड्डिएं दे ब्यौरे, तरीक ते थाह सने देय धनराशि बी स्पष्ट करनी होग। संशोधन दे मताबक इक ई-नोटिस दे जोआब च बकाया देय उपभोक्ता शुल्क

असल टोल शुल्क दा दूना होग। इस नियम च गड्डिएं दी निविघ्न ढंगे'ने पन्छान ते बकाया शुल्क दे प्रवतन गी सक्षम बनाने लेई गड्डिएं दे डेटाबेस कन्ने राष्ट्रीय इलेक्ट्रॉनिक टोल संग्रह प्रणाली गी एकीकृत करने दा बी प्रावधान ऐ। मंत्रालय ने दस्सेआ ऐ जे एह संशोधन टोल परिचालन च पारदर्शिता गी बढ़ावा देग, निवेशके दे विश्वास गी प्रोत्साहित करग ते वैध ते माली सुरक्षा प्रदान करग। एह संशोधन देशै च अनुपालन तंत्र गी सशक्त बनाने ते आधुनिक, सक्षम ते रूकावटें शा मुक्त टोलिंग तंत्र गी समर्थन देने दी दिशा च इक महत्वपूर्ण गेह ऐ।



Chaitra Navratri

चेतर नरातें दा पवितर उत्सव अज्जै थमां शुरू होई गोआ ऐ। 9वें दिनें तगर चलने आहले इस पर्व गी लेइयै देशभरै च जोश ते उमंग ऐ। नरातें दे पैहले दिन अज्ज बकख-बकख देवी-द्वारे च बशेष पूजा-अर्चना कीती जा'रदी ऐ। अज्ज लोक अपने घरे च साख ला करदे न ते विधिवत तरीके कन्ने कंजक पूजन बी कीता जा'रदा ऐ। नरातें दे इस पर्व दा समापन रामनौमी दे पर्व कन्ने होग। तोआई प्रधानमंत्री नरेद्र मोदी हारे अज्ज देशवासिये गी चैत्र नरातें दिआं शुभकामनां दितिआं न। प्रधानमंत्री हारे सोशल मीडिया दे इक संदेस च सबने लेई सुख, सौभाग्य, समृद्धि ते खरी सेहत दी कामना कीती ऐ। श्री मोदी हारे शक्ति स्वरूपा मां दुर्गा हारेगी प्रार्थना कीती ऐ जे ओह विकसित भारत दे प्रति राष्ट्र दे संकल्प गी नमी ऊर्जा प्रदान करन।



PM -Kuwait

प्रधानमंत्री नरेन्द्र मोदी हारे कल कुबैत दे युवराज शेख सबाह अल -खालिद अल-हमद अल-मुबारक अल-सबह हुंदे कन्नै टेलीफोन पर गल्लबात कीती ते औंदे ईंद दे ध्यार दियां शुभकामनां दितिआं। सोशल मीडिया दी इक पोस्ट च श्री मोदी हारे दस्सेआ जे गल्लबात दे दरान उ'नें पच्छम एशिया दे बदलदे हालात पर बचार बटांदरा कीता ते हाल दिये घटनाएं पर चेंता जताई। प्रधानमंत्री हारे कुबैत दी संप्रभुता ते इलाकाई अखंडता पर हमले दी सख्त निंदेआ कीती। दौने नेताएं आखेआ जे होर्मुज जल डमरु मध्य थमां समुन्दरी जहाजे ते किशितये दी सुरक्षित ते निर्विघ्न ढंगे नै आओ-जाई जकीनी बनाना सब्बने शा पैहली प्राथमिकता बनी दी ऐ। दौने पक्खे इलाकाई शांति ते स्थिरता बनाई रक्खने लेई लगातार राजनयिक सम्पर्क बनाई रक्खने दी जरुरतै पर बल दिता।



Chouhan- Farmers

लोकसभा नै कल कृषि ते करसान कल्याण मंत्रालय दे बरे 2026-27 लेई अनुदान मंगे गी मंजूरी देई दिती। कृषि ते करसान कल्याण मंत्री शिवराज सिंह चौहान हारे आखेआ जे सरकार- करसाने दी औंदन बधाने- खाद्य सुरक्षा जकीनी बनाने ते जनता गी सत्तदार खुराक उपलब्ध करोआने लेई लगातार जतन करारदी ऐ। श्री चौहान हारे दस्सेआ जे बरे 2013-14 च कृषि लेई बजट छड़ा 21 जहार 933 करोड़ रपे हा- जेहड़ा हुन बधिये इक लक्ख 30 जहार करोड़ रपे

शा मते होई गेआ ऐ। उ'नें आखेआ ऐ जे प्रधानमंत्री नरेन्द्र मोदी हुंदे नेतृत्व च केन्द्र सरकार- राई-बाई दा उत्पादन बधाने आस्तै लगातार कम्म करा'रदी ऐ। उ'नें गलाया जे अन्नदानें ते बागवानी उत्पादें दी रिकार्ड पैदावार दर्ज कीती गई ऐ। शिवराज सिंह होरें इब्बी आखेआ जे बरे 2014-15 च 26 करोड़ 50 लकख टन अन्नदानें दा उत्पादन होआ हा- जेहड़ा हुन बधियै 35 करोड़ 7 लकख टन होई गेआ ऐ। बागवानी च बी उत्पादन 27 करोड़ 70 लकख टन शा बधियै 37 करोड़ 70 लकख टन धोड़ी पुज्जी गेआ ऐ।

<><><><><><>

LPG -Allocation

सरकार नै पच्छिम एशिया च बने दे मजूदा हालात गी दिक्खदे होई राज्यें च कारोबारी LPG दे आबंटन गी 20 फीसद कोला बधाइयै 30 फीसद करने दा आहवान कीता ऐ। पेट्रोलियम ते कुदरती गैसैं सरबंधी मंत्रालय दियें संयुक्त सचिव सुजाता शर्मा होरें कल नमीं दिल्ली च अंतर-मंत्रालयी वार्ता दे दरान एह जानकारी सांझी कीती। उ'नें गलाया जे सरकारै बड्डे शैहरें ते होरनें शैहरी इलाकें च बवसायिक एल.पी.जी उपभोक्ताएं गी गुजारश कीती ऐ जे ओह PNG दा इस्तेमाल शुरु करन। उ'नें दस्सेया जे देशै दियें रिफाईनरियां अपनी पूरी समर्थ कन्ने कम्म करा'रदियां न ते घरेलू एल.पी.जी दा उत्पादन 40 फीसद तगर बधेया ऐ। उ'नें दस्सेआ जे पिच्छले किश दिनें दे दरान 12 जहार शा मते छापे मारे गे न ते तकरीबन 15 जहार सलैंडर जब्त कीत गे न।

<><><><><><>

PSC –EAM

बदेशी मामलें बारे संसद दी स्थाई कमेटी दी इक बैठक कल संजा संसद भवन परिसर च लाई गई। इस मौके पर बदेश मंत्रालय दे प्रतिनिधियें पच्छम एशिया च जारी संघर्ष दे दरान भारतवंशियें दी सुरक्षा ते घर वापसी बारे कमेटी गी जानकारी दिती। कमेटी दे प्रधान ते कांग्रेस दे वरिष्ठ सांसद शशि थरुर होंरें इस बैठक दी प्रधानता कीती। बैठक परैन्त मीडिया कन्नै गल्ल करदे होई श्री थरुर होंरें दस्सेआ जे पैहली चर्चा- पच्छम एशिया दे बारे च ही ते ओदे च कुल 17 सदस्यें हिस्सा लैता। उ'नें दस्सेआ जे हर कुसै नै एल्ले बने दा हालात पर चेंता बुज्झी ते भारती बसनीकें दी सुरक्षा पर जोर दिता। उ'नें दस्सेया जे इक होर बैठक पिच्छले महीने नमीं दिल्ली च आयोजित AI Impact शिखर सम्मेलन दे बारे च ही।



IPL

इंडियन प्रीमियर लीग-आई.पी.एल. दे शुरुआती किश मैचें च ईशान किशन सनराइजर्स हैदराबाद दी कप्तानी करडन। अभिषेक शर्मा टीम दे उप-कप्तान रौहडन। पैट कमिंस अजे धोड़ी पिट्ठ दी सट्ट थमां पूरी चाल्ली ठीक नेई होई सके दे न। नियमित कप्तान कमिंस पूरी चाल्ली फिट होने दे बाद कप्तानी दी जिम्मेदारी परतियै सांभी लैडन। तोआईं भारती टीम दे विकेटकीपर बल्लेबाज ईशान किशन ने मेद बुज्झी ऐ जे ओह उंदा प्रदर्शन, देशै दे युवा खड्ढारिएं लेई इक प्रेरणा साबत होग। सनराइजर्स हैदराबाद दा पैहला मैच मजूदा चैंपियन रॉयल चैलेंजर्स बेंगलुरु दे खिलाफ बेंगलुरु दे एम.चिन्नास्वामी स्टेडियम च औंटी

28 तरीक गी होग। एहदे परैन्त उंदा दुआ मुकाबला अगले म्हीने दी 5 तरीक गी लखनउ सुपर ज्याइंट्स कन्नै होग।



IMD-Weather

मौसम विभाग नै जम्मू-कश्मीर ते लद्दाख च कलै तग्गर बड़ी तेज बरखा दा ऑरेंज अलर्ट जारी कीता ऐ। दिल्ली, पंजाब, हरियाणा, हिमाचल प्रदेश, उत्तराखंड, राजस्थान, चंडीगढ़, छत्तीसगढ़, पूर्वी मध्य-प्रदेश, मध्य महाराष्ट्र, मराठवाड़ा, ओडीशा ते पश्चिमी उत्तर प्रदेश च अज्ज एनगड़े कन्नै बरखा बरने दा अंदाजा लाया गया ऐ। आंध्र प्रदेश, गुजरात, मध्य प्रदेश, उत्तरी अंदरुनी कर्नाटक, तेलंगाना ते विदर्भ च बी अज्ज इयै लेया मौसम बने दा रौहग। समुन्द्री कंडे आहला कर्नाटक, कोकण, गोवा, तमिलनाडू, पुदुचेरी, कारइकल, झारखंड, केरल माहे, पश्चिम बंगाल, सिक्किम ते पूर्वोत्तर राज्यें च बी अज्ज बरखा बरी सकदी ऐ।

